

*meya kartî*  
*û*  
*çend mêweyên salê*

*helbest*

**Umîd Demîrhan**



*meya kartî*  
*û*  
*çend mêweyên salê*


**helbest**

Umîd Demîrhan

---

*çapa jimarîna bêpere*

---



# **sewad**

*Rêza Dîwanan: 2*

*Dîwan © Umîd Demîrhan*

*Sererastkirin û amadekirina çapê:*  
Umîd Demîrhan

*Çapa Yekem*  
**2011**

# **sewad**

## **Di Wateya Pêşgotinê De Çend Hevok**

Min di destpêka salên nodî de dest bi xwendina kurdî kiribû û piştî wê demê min ji xwe re hinek helbest û çîrok nivîsîbûn. Helbet ev helbest û çîrok ne ji bo weşandinê, lê ji bo pêşvebirina hêza nivîsandinê bûn. Çend roj berê min arşîva xwe ya kevn tesele dikir û ez rastî vê lînûska xwe hatim. Bi rastî ev helbestên ku her yek li cihekê hatiye nivîsandin ewqasî ne xerab bûn û weşandina wan pêkan bû. Lewre min xwest ku ev hest û ramanên min ên kevn di taldeyê demê de nerizin û neçin. Lewre ez îro wan li gorî mêjûya nivîsandinê rêz dikim û radeştî rexneyên têkildaran dikim. Mixabin mêjûya hinek helbestan ne diyar e û ez nizanim min kengê ew nivîsîne; lêbelê wisan bawer dikim ku di navbera 2000-2008an de hatine nivîsandin. Her wiha hinek helbestên min ên îsalîn jî hebûn û min nexwest ew jî li derve bimînin. Min navê vê defterçeyê "*Meya Kartî Û Çend Mêweyên Salê*" danî. Her wekî hûn jî dizanin hinek tişt çiqasî kevn û kartî bibin ewqas giranbiha dibin. Ji aliyê wêjeyî ve ewqas ne giranbiha bin jî heyama nivîsandinê nîrxê wê zêde dike li gorî min.

Silav, rêz û niyazên xweşbextiyê;

**Umîd Demîrhan**

*16.12.2011, Bazîd*

## **Golegenî**

Kambax e rûmet.  
Dara sincê bêmizêc e.  
Çemê Nîlê diherike bîqusûr

Mêjî  
ne golegenî.

*Sermawez, 1993/Qahîre-Misir*

## **Avê Qurban Rapere!**

Avê qurban rapere  
û min dayne lengergeheke ewle.  
Ji min mexeyide,  
hêrsa xwe meyîne  
û cardin li min dagere.

*Tîrmeh, 1996/Cida-Erebistana Siûdî*

**De Bila Meçin, Mexwînin! De Bila Meçin, Meşêlin!**

Heval li pêşberî min rûne!  
Rûçikê min bixwîne  
seba kerba min bişkîne  
straneke sexte.

*Berfanbar 1997/Xertûm-Sûdan*

## **Helbestên Rimbazan**

Ximximê borîzan!  
Dijmin vedrêj gemar e.  
Dijmin vedrêj gemar e.

Gazî xortên çeleng kin  
Çiya li wan debar e.  
Çiya li wan debar e.

Kulîna diyan vekin!  
Xwarin tê de girar e.  
Xwarin tê de girar e.

Zexîra bavan vekin!  
Şûna wê ya berwar e.  
Şûna wê ya berwar e.

Gelo! Peyvan guhdar kin!  
Aramî ji Xwedê dibare.  
Azadî şêrê siwar e.

*Tîrmeh 2000, Kerbela-Iraq*

## **Stêrkek Teyisî**

Saxîsaxî çermê jinekê gurandin,  
ji her taxê deyûsek civandin,  
agirê malan damirî  
û li dewsa zamokan singekê tûzikê çikandin.

*Tîrmeh 2000, Ordîava-Nexşevan*

## **Dendika Evînê**

Bizmar riziyan, war hilweşiyân  
û bêçare man kevokên bejî.  
Perikên çavên te bûn kelem  
û di sîngê min de çikilîn.

Belekî heliyan,  
zîl da çêreya biyanî  
û min tu dîtî bûka çiyê!  
Li parxana kevirekî  
te xwe spartibû evînê  
û baranekê tu bi min dayî naskirin.

Min salixên te ji diya xwe re dan  
û wê jî bi eslê te derxist;  
şecereya te digihand nifşeke bimbarek.  
Niha ji bîra min çûne  
her çî gotibe derbareya te de;  
lê hê di wê rojê de min navek li te danîbû:  
Dendika evînê.

*Gulan, 2000/Eşqava-Tirkmenistan*

## **Porê Serê Min Vîzvîzî**

Vê havînê  
xwîn nakele di rehan de.  
Dilê min dê bibe dîzeke bêçembil  
û nayê hildan ji ser êgir.

Vê havînê  
ger te nebînim  
ez ê har bibim.  
Hêlînên hemû dûvmeqeskan  
divê tar û mar bibin  
bi her du destên min  
ger te nebînim.

Nizanim ji çi xemê  
wisan sergerm im  
û porê serê min vîzvîzî.  
Îro li vê bihurê,  
îşev li vê guherê  
wekî pezeke gêj  
ku kevirê bêriya xwe  
ji bîr kiribe.

*Tîrmeh, 2000 Meşhed-Îran*

## **Ahengên Şêr**

### **I. Amadehî**

Ger bibit şer an jî aştî pêwistî  
têne hilgirtin şûrên hilawistî.  
Ta biryarek bête pejirandin  
divê tu qet ranewestî.

### **II. Temtêl**

Ji hêrsan çav sor dibin  
diran dişidin  
ala berbijor dibin  
ser difirin ji ser cendekan  
kalan dişkên  
û şûr ko dibin.  
Ger serkeftin bête payîn  
li dewsa lêdana şûran  
peyman xwedîbandor dibin.

### **III. Rawestan**

Zar û zêç  
li hêviya vegera te ne.  
Hê heval hene;  
ken û henek hene;  
pêlên behran û zozan jî;  
lê şûrê xwe bêyî rûnkirin daynene!

*02.06.2003, Stenbol*

## Şemala Rûyê Te

Li wê derê şeverêş bû;  
çavan çav nedidîtin;  
debara me peşkek ronahî bû  
û me ji te deyn dikir defşeyek.

Lêvên me diqirçîn;  
giyanê me diket gewriyê;  
xwîn ziwa dibû di rehan de  
û me tenê hêvî dikir ramûsanek  
dema fişeng diteqîn.

Dema astengiyan diajote ser me  
em digihiştin remeqa dawîn;  
lê cardin hêz diket gehên me  
dema şemala rûyê te  
ronahî dida civakan!

*02.06.2003, Stenbol*

## Malikên Têkel

- a. Min li Amedê silav da hesinkerekî.  
Siwar bûm li hespê, peya bûm ji kerekî
- b. Şemala te heyveke çardeşevî.  
Ji ber xeyala te xewa min îşev revî.
- c. Li pey hevhatin raman û guman.  
Xwe li min ditelîne barana riman.
- d. Hevrê, bimeş; karwan dipeke!  
Vîna te hesin, serfirazî gultek e.
- e. Mamoste got ku çar zindan e jîyan.  
Şagird bi ser ve çû û got: Cardin jîyan.
- f. Kengê xizanî pelpût kirin,  
wê hingê dadwerî kelkût kirin.
- g. Sefaletê, dewsa te li bin piyê min.  
Êdî saqên gênim digihên bejna min.

## Sêrêzikên Zarokan

- a.** Bihar hat, havîn jî hat.  
Dewar hat, gavan çima nehat.  
Çîrokekê bibêje ta ku xewa min hat.
  
- b.** Reşo, Reşo berde sê.  
Se revî û kete qefesê.  
Dêrî bigire, ew besê.
  
- c.** Gulok gulok rîsê min,  
Heçî kefkani ye, îşê min.  
Da ku neyar neyê tûşa min.
  
- d.** Berxa min a deqdeqî.  
Gur te mekin şeqşeqî.  
Xwediyan meke mereqê.
  
- e.** Ref ref diçûn qaqlîbaz,  
wek yekîneya li pey serbaz.  
Betlaneya we xweşderbas.
  
- f.** Kerê we bikurtan e.  
Li ser binvîse: Firotan e.  
Lê meşîne mezada hespan e.

## Çarînên Çarmêrkî

- a.** Zarokino! Dewr û dewran.  
Zarokino! Aş û karwan.  
Zarokino! Bawerî û berxwedan,  
li benda we rawestiyane.
- b.** Gelê min wa alaya we!  
Wa artêş û pergala we!  
Wa dîrok û debara we!  
Bilezînin, dem xedar e!
- c.** Fetla yekan rast here!  
Rast here û rast vegere!  
Bi çepê her paqij bike!  
Bêyî çepê rast jî venagere.
- d.** Gulok gulok janên me.  
Devok devok wêjeya me.  
Hindik hindik lê bikolin,  
dê were serfiraziya roja me.
- e.** Hevraz û berjêr wekhev in,  
Xwihdan û bergind serhev in.  
Ên ku serfiraziyê naxwazin,  
di tengasiyê de zû direvin.

## **Pêncrêzikên Şêpenci**

Ez Şêpencê Makoyî  
Şêrê hewayê çiksayî  
Li ba min her asayî  
Kî li temtêla min binêre,  
dibêje: Tu mîr î yan paşe yî?

Şûr û mertalê min mawzer e.  
Şûna min şkefta Girê Zer e.  
Li pêş dêrî notirvan li ber e.  
Ger bixwazî dîtina min,  
Tu dê bibînî lana min mêvandar e.

Her roj barê min nicde ye.  
Her şev karê min sicde ye.  
Heqê neyarê min li vir hucre ye.  
Fatîheyê bixwîne li ser neheqiyê.  
A ku me dicivîne hev qible ye.

## **Ji Biyanistanê Çend Çarîn**

Tu bidî xatirê wan tizbiyan:  
Ew tizbiyên ji poz û guhan.  
Carekê be jî li rûyê min binêrî  
da ku ji peratê re bibe derman.

Tu bidî xatirê serên jêkirî:  
Serên bi kindiran darvekirî.  
Carekê tifi navçava min kî  
pê derxim çima pîroz e girî.

Tu bidî xatirê wan rehekan:  
Rehekên ku bûne rehîna agiran.  
Carekê delavê Firatê berdî  
da ku piçekê şil be korewijdan.

Tu bidî xatirê keçên sibirandî  
û zêmarên li ser goran nehvirandî.  
Carekê ji devê xwe bişehitînî  
Wê peyva ku mirinê dike zindî.

*14.06.2010, Elbeyda/Libya*

## Tirsê! Pêsiira Min Berde!

*-ji bo Henîfiyê Hecî Şero-*

Temenê min  
bi qasî jînenîgariya<sup>1</sup> mirovahiyê dirêj e:  
Beriya ku Quran bê hinartin<sup>2</sup>  
min helbest dixwendin li bazara Uqazê<sup>3</sup>  
û dema ku Talût<sup>4</sup> winda bû  
di nav rûpelên Talmûdê<sup>5</sup> de  
min mezmûrên Zebûrê<sup>6</sup> dinehwirandin.<sup>7</sup>

---

<sup>1</sup> **jînenîgarî:** biyografî

<sup>2</sup> **hinartin:** şandin

<sup>3</sup> **Uqaz:** sûqeke erebên qureyşê ye û mihrcanên helbestan lê dihatin lidarxistin

<sup>4</sup> **Talût:** fermanzarekî cihûyan e û di dema Pêxember Dawid de jiyaye.

<sup>5</sup> **Talmûd:** şîroveya Tewratê ye û ji aliyê haxamên cihû ve hatiye berhevkirin.

<sup>6</sup> **Mezmûrên Zebûrê:** ayetên pirtûka pîroz a ku ji Pêxember Dawid re hatine şandin

<sup>7</sup> **nehwirandin:** bi dengê nizm tiştine sergirtî gotin, di ber xwe de axaftin

Paniyên min qelişî ne:  
 ji dûreriye<sup>8</sup> dereke<sup>8</sup> vedigerim,  
 ji devdelingên<sup>9</sup> min bêhna cehtera<sup>10</sup> biyanî difûre<sup>11</sup>  
 û kefzehên zeryayî<sup>12</sup>  
 di nav pirça qefesa min de kesk dibiriqin.  
 Di binebêrikên<sup>13</sup> min de xiştexiştê kakilên<sup>14</sup> behîvan e:  
 Heke di taxê de hê zarokên negurandî<sup>15</sup> mabin, para wan e;  
 lê bawerim ku dewr dewra firewnan<sup>16</sup> e li Meydana Tehrîrê<sup>17</sup>  
 û ji devhuçikên<sup>18</sup> min sinbil dadiweşin beravên Nîlê.  
 Li bîranînên xwe diramim  
 û noqî dîroka evînê dibim;  
 lê kiloxên Dêra Qiyametê  
 radiweşin<sup>19</sup> çolistana Sînayê  
 û Evîna Tahir Begê dide dû xirdikekî<sup>20</sup> biyanî.  
 (Li gorî gotinên gotindaran<sup>21</sup>  
 ji bilî Şaşoyê Pîrêhevalên min gişt di dîlana wê de direqisin.  
 Xwedê hifza mirovî bike,  
 gayê malê biçe cot  
 û gavan ji conegayê xelqê re gijogijo bike<sup>22</sup>.)

<sup>8</sup> **dûreriye dereke:** riyên dûrên li deverên nenas

<sup>9</sup> **devdeling:** devlingê şal û derpiyan

<sup>10</sup> **cehter:** çêreyeke çolê ya bêhnxeş e û wekî biharatê di xurekan de tê bikaranîn

<sup>11</sup> **fûrîn:** ji ber kelîn û zêdebûnê bi ser re avêtin (ji bo şilahiye)

<sup>12</sup> **kefzehên zeryayî:** cureyekî çêreya ku di navaavê de an jî di nava şilahiye de şîn tê

<sup>13</sup> **binebêrik:** binê cêbê

<sup>14</sup> **kakil:** dendik û tovê rehekan/nebatan

<sup>15</sup> **negurandî:** postnekirî

<sup>16</sup> **firewn:** mîr û serekên Misira Kevn

<sup>17</sup> **Meydana Tehrîrê/Azadiyê:** li Qahireyê meydanake sereke ye

<sup>18</sup> **devhuçik:** devmilê cilan/kincan

<sup>19</sup> **raweşin:** lê belav bûn

<sup>20</sup> **xirdik:** mirovê bejnkînik/qamkînik

<sup>21</sup> **gotindar:** kesê ku gotinê vedibêje

<sup>22</sup> **gijogijo kirin:** bi peyva gijogijoyê ga berdan ser çêlekê; gadan

Kifş e, hê di şeverêşa dilê min de hîv hiltên  
û di kelekela vê xiyaretê de ewr min hambêz dîkin.  
Bes e, min zîmanê xwe gez kir ji kerban  
Bes e, serçîkên<sup>23</sup> peyvên pişîrîn<sup>24</sup> bêxwedan.  
Tirsê! Pêşîra min berde!  
Hemû rê bi zorê vedibin  
û şkeft têk dibin meclisan.

*06.07.2010, Elbeyda/Libya*

---

<sup>23</sup> **serçîk:** sermemik

<sup>24</sup> **pişîrîn:** (rehek/nebat) zibilîn û hûrî erdê bûn

## Qiblename

*Di navenda dilê min de tu heyî  
û êdî ji qeyranan natirsim.*

### I.

Li rojhilatê dilê min berbang e.  
Di esmanekî tehfîrkirî de  
Hecî Qurbanê Silêmanî Destana Cecoxanî vedibêje  
û Kawis Axayê Milanî serpêhatiya Simkoyê Şikakî.  
Paşê taveke havînê  
xwe berdide şaxên dilê min  
û tîrêjên germ digihêjin gorên komî.  
Di kelekela vê havînê de  
li siya rastiyeke digerin çavên min.  
Hêviyên min di dilqê şêresiwerekî de dadiliqin xewna Ejdehayî  
û Kawa pîfî êtûna dîrokê dike li Kirmanşanê.

## **II.**

Li rojavayê dilê min şeverêş e.  
Zarok hişkehişk dayikên xwe hambêz dikin  
û findên derewçînan dadimirin  
ji ber heybeta te  
ango ji ber nûçeyên hilatina rojê.

## **III.**

Li bakurê dilê min qeşa heliyaye,  
mêşên hingivî raweşiyane Zozanên Elegezê  
û bilûra şivanekî kurd straneke şedadiyan dilorîne.

## **IV.**

Li başûrê dilê min bêdengiyek serdest e  
û hemû zarok raçaviya kalekî temendirêj dikin  
da ku digel çîrokan xilmaşî jiyanekê efsûnî bibin.

*29.07.2011, Bazîd*

## Cejnek Wiha Bihurî

*-ji bo heval û hogirên li biyanistanê-*

Ka ew cejnên berê?  
Berê kirtekirta çarixên me  
nasnameya me diyar dikir.  
Berê hebûna me  
qurbana hebûna xelqê bû.  
Zimanê me yî çiyayî jî  
colek ji zimanên der û dorê bû.

Lê ev cejnên niha?  
Niha otopsiya hestiyên pakrewanan  
nexşeya giyanê hov û koviyan xêz kir.  
Niha hebûna me  
ne rehîne kêfxweşiya xelqê ye.  
Zimanê me yî deştî jî  
bi tîpa /t/yê hesiya.  
Lewre peyvên wekî "tirk, tehçîr, tenkîl û texrîb"ê  
ji nû ve hatin şîrovekirin.

Cejnek bêyî pîrozbahiyê bihurî,  
dewraneke pedersahiyê guherî  
û şamanîzma serqot  
di dilqê taxûtekî sergirtî de vegeî.  
Ne hukmê meh û şahiya pîroz pere kir  
ne jî kêzmê zilmê xwîna te sar kir.  
Êdî peyva "xwezila" ji ferhenga berxwedanê ketiye;  
lewre çavekî min li naveroka peyva "viyan"ê  
û yê din jî li wateya peyva "jiyan"ê gerî.

Li fêza Babîlê, li warê baxçeyên daliqandî  
li ser wê pireya wekî marekî di kovelanê  
siwareyek hate bombekirin û encam:  
Solîneke sotandî, malbateke qurçimandî,  
tetqal tetqal xwîn, mertal mertal berxwedan...  
Di wê şevreşê de  
em li taca ronahiyê geriyan  
û ji Wanê brûskekê riya me ronî kir.  
Belê, ev cejna pîroz a bêpîrozbahî  
di lîsfê şîneke neteweyî de bihurî.

*03.09.2011, Bazîd*

## **Bersiva Rast Hilbijêre**

Xwîna kurdan yek e  
û jimareya yekê tenê li yekê tê parvekirin.  
Welatê kurdan çend parçe ye  
û çima jimareya yekê  
bi destî hûrjimareyan hatiye parçekirin?

### **A.**

Dilê te qadeke parastî ye.  
Ne sima hespekî teterî lê ketiye  
ne jî bi lavija şamanekî Gok Tengrî lewitiye.

### **B.**

Çavên te mîrkutê dadwerekî ne.  
Di bin piyên te de maf napirçiqin  
û bi hildana navê te diz vediciniqin.

### **C.**

Yek bi pirjimareyan hatiye parçekirin  
û bi vî awayî hûrjimare derketine holê.  
Welat bi darê zorê hatiye parçekirin  
û zordaran desthilatî radestî hev kirine  
wekî ku seg bi dorvegerî hilperikîne dêleke tele.

#### D.

Xwîna nemerdan li erdê dimîne,  
alaya sitemkaran dibe pîne  
û ayîka bizina kol ji ya biqiloç re namîne.

#### E.

Mirovê mafdar bi berteka xwe çekdar e jî.

#### ***Nîşeya xwediyê pirsê:***

1. Keda gelekî bi şîfreyan nayê çilfisandin.
2. Makurk li ser hêkên genî nayê melisandin.
3. Zûrezûra gurekî bi olana fişengekê tê tepisandin.
4. Çeleçela belhaman<sup>25</sup> mûsayekî nade tirsandin.

---

<sup>25</sup> **Belham Ben Bahura:** Haxamekî cihû bûye û dema Cn. Mûsa eleyhîselam amadehiya şerê Hukimdarê Filistînê dike, hukimdar jî gefan li Belhamî dixwe û alîkariya wî dixwaze. Li ser wê yekê Belham bi navên Xwedê yê herî pîroz nifiran li Cn. Mûsa eleyhîselamî dike ku dev ji vê niyêta xwe berde. Birastî jî artêşa pêxemberê Xwedê nikare têkeve Filistînê û piştî Cn. Mûsa eleyhîselamî pêxemberekî din ê bi navê Yûşa eleyhîselam Filistînê feth dike. Lewre ev nekes di Quranê de wekî kûçikê ku dike hilehil û zimanê xwe dadiliqîne hatiye tarîfkirin. Êdî navê wî bûye nîşenaye oldarên ku zanyariyên xwe dikin xizmeta zilmê."

## **Êdî Pisîkeke Te Jî Heye, De Bigirî!**

*-ji bo xwendevanekî bi nasnavê Seydo-*

### **1. Profîla Rojenikîrî**

Te bi salan nivîsî,  
gelek ciwanan  
nivîsên te wekî nivîştan avêtin stûyên xwe  
û ber bi penagehên SSê meşyan;  
lêbelê dengê te bi qasî simbêlên te zirav bû.  
Lewre axayê te ji te hez kir  
û sifreyeke têrtijî raxiste ber te.  
Noşîcan ji te re!  
Noşîcan ji axayê te re!

Femandarê Bermûdayê destê xwe li pişta te xist  
û toza sî salên tarawgehê dawêşand.  
Berdevkê wî yê siyasî jî sipasiya te kir  
û kartên aferînê li ser te de bariyan.  
Lewre krediya axaftina te hate dirêjkirin  
li ser hesabê gelê Dêrsimê.

## 2. Çalakiya Dawîn

Rêhevalê te yê bi navê Yilmazê Şame  
Destana Agiriyê nivîsî û karwanek bi rê xist.  
Lewre tu yê derbasî rojhilatê Firat û Dicleyê nebî  
da ku qîrçe qîrça çekên serhildêran neyê tomarkirin  
û qîrçe qîrça hestiyên li Geliyê Zîlanê nekeve raporên CPTyê.

Tu li cem axayê xwe rûne.  
Em ê ji te re pisîkeke Wanê ya yekçavî bişînin  
li ber rîtma yekala, yeknetewe û yekwelatî.  
Bila mirazê te di çavên te de nemîne.  
Em ê ji bo xatirê te çavekî wê jî kor bikin;  
lê em matmayî ne û nizanin  
bê ka em ê kîjan çavî birijînin:  
Em çavê hêşîn bipijiqînin baş e an çavê kesk?  
Bila haya te pê hebe ku hêşîn rengê esmên e,  
kesk jî rengê daristanê ye  
û dilên me di ber dernakeve, destên me naçin her du rengan jî.  
De êdî tu biryarê bide  
an jî wekî her carê  
mafê biryardanê bispêre şagirtê Eliyê Kîmyewî.

### **3. Pêşniyara Xwendevanekî**

Di vî temenî de  
bila êdî pisîkeke te jî hebe.  
Bi wê ajaloka xwe here serdana şêrên girtî  
û kişkişî wan bike.  
Paşê vegere xanmanê xwe yê lawan  
û xwe amadeyî bernameyeke TRT6ê bike.  
Ne bila dengê Seyadê Şame were guhên te  
ne jî stranên wî yên li ser Biroyê Hesikê û lehengên bênav.  
Pirtûka Yilmazê rêhevalê xwe jî  
virvirkî biavêje goreke komî an jî çaleke asîdê  
û bila ji ber çavên dîrokê biheyibe.  
Rola xwe baş bilîze ha:  
Ji koçbereke selpakfiroş destmalekê bikire  
û derkeve ber kamerayan.  
Jixwe êdî pisîkeke te jî heye, de bigirî!  
Pê bikute erdê  
û rik bikute kedê!  
Ji te re serkeftin serbaro!

*11.08.2011, Bazîd*

## PÊRISTA NAVEROKÊ

<b>Rêz</b>	<b>Hêman</b>	<b>Rûpel</b>
<b>1</b>	Di Wateya Pêşgotinê De Çend Hevok	<b>3</b>
<b>2</b>	Golegenî	<b>4</b>
<b>3</b>	Avê Qurban Rapere!	<b>5</b>
<b>4</b>	De Bila Meçin, Mexwînin! De Bila Meçin, Meşêlin!	<b>6</b>
<b>5</b>	Helbestên Rimbazan	<b>7</b>
<b>6</b>	Stêrkek Teyisî	<b>8</b>
<b>7</b>	Dendika Evînê	<b>9</b>
<b>8</b>	Porê Serê Min Vîzvîzî	<b>10</b>
<b>9</b>	Ahengên Şêr	<b>11</b>
<b>10</b>	Şemala Rûyê Te	<b>12</b>
<b>11</b>	Malikên Têkel	<b>13</b>
<b>12</b>	Sêrêzikên Zarokan	<b>14</b>
<b>13</b>	Çarînen Çarmêrkî	<b>15</b>
<b>14</b>	Pênçrêzikên Şêrpencî	<b>16</b>
<b>15</b>	Ji Biyanistanê Çend Çarîn	<b>17</b>
<b>16</b>	Tirsê! Pêşîra Min Berde!	<b>18</b>
<b>17</b>	Qiblename	<b>21</b>
<b>18</b>	Cejnek Wiha Bihurî	<b>23</b>
<b>19</b>	Bersiva Rast Hilbijêre	<b>25</b>
<b>20</b>	Êdî Pisîkeke Te Jî Heye, De Bigirî!	<b>27</b>
<b>20</b>	Pêrista Naverokê	<b>30</b>